



JUDICIAL SYSTEM MONITORING PROGRAMME PROGRAMA MONITORIZASAUN BA SISTEMA JUDISIÁRIU

Komunikasu Imprensa Periodu 25 Setembru 2023

JSMP kontinua fasilita TOT ho matéria violénsia bazeia ba jéneru no tráfikú umanu ba lideransa transformativa iha suku Beiseuc

Iha 19 to'o 22 Setembru 2023, JSMP kontinua fasilita treinamentu treinadór ka *training of trainers (ToT)* ba lideransa suku no membru comunidade sira iha Suku Beiseuc, Postu Administrativu Tilomar Munisípiu Covalima.

Matéria sira ne'ebé apresenta iha sesaun ne'e mak metodolojia apresentasaun matéria kona-ba igualdade jéneru, violénsia bazeia ba jéneru (VBJ), tráfikú umanu, prevensaun no apoia vítima, lideransa transformativu no sistema referál ba kazu VBJ no tráfikú umanu.

JSMP espera katak partisipante sira husi "ToT ne'e iha ona koñesimentu no abilidade ne'ebé suficiente hodi bele disemina tutan fali informasaun ka matéria sira ne'ebé hetan durante lora haat ba membru comunidade sira seluk. Nune'e, parte hothotu, liuliu comunidade sira iha suku refere ba iha informasaun ne'ebé suficiente kona-ba tráfikú umanu no violénsia bazeia ba jéneru. Alende ne'e, bele identifika no halo denúnsia tuir makanizmu ne'ebé iha bainhira iha kazu ruma," dehan Sra. Ana Paula Marçal Diretóra Ezekutivu JSMP.

Objetivu husi treinamentu ida ne'e mak atu hasa'e koñesimentu lideransa suku sira (xefe suku, xefe aldeia sira, delegadu/a no joventudi) suku Beiseuc kona-ba matéria igualdade jéneru, violénsia bazeia ba jéneru, tráfikú umanu no prevensaun no apoia ba vítima kazu VBJ no trafiku umanu. Alende ne'e, fó treinamentu kona-ba saida mak lideransa transformativa no mós metodolojia atu fahe informasaun.

Iha abertura treinamentu ne'e, Sr. Saturnino Cardoso Maia, xefe suku Beiseuc agradese tebes ba JSMP, tanba kontinua hakbiit estrutura suku Beiseuc kona-ba materia igualdade jéneru, violénsia bazeia ba jéneru, tráfikú umanu no metodolojia apresentasaun matéria sira. Xefe suku fiar katak ho formasaun ba dala rua ne'e bele hakle'an liutan sira nia koñesimentu, nune'e sira bele transmite informasaun sira ne'e ba comunidade sira seluk. Xefe suku mós husu ba partisipante sira atu tuir formasaun ne'e ho konsentrasaun, ativu no labele falta durante lora haat ne'e, nune'e bele hatene matéria sira ho di'ak no bele fahe tutan ba comunidade sira iha suku no aldeia.

Entretantu kona-ba preokupasaun sira liga ho igualdade jéneru, violénsia bazeia ba jéneru no kazu tráfikú umanu, partisipante sira husu katak kazu violénsia doméstika liliu feen la'en problema mak viziñu sira haree no ba keixa maibé kuandu polisía to'o mak feen la'en ne'e dehan ba polisía katak sira problema laiha ne'e oinsa? Kazu tráfikú umanu karik iha comunidade ema balun mai halo rekrutamentu maibé ikus mai deskonfia katak rekrutamentu ne'e bosok, comunidade bele keixa ka lae? Oinsa

kazu sira ne'ebé envolve labarik sira sai autór ka vítima? Iha aldeia kazu feen-la'en baku malu Polisia sira hare ho matan feen-la'en baku malu maibé la prosesu ne'e oinsa?

Hatan ba kestaun ne'e, JSMP esplika katak lei fó dalan ba ema hotu atu apresenta denúnsia bainhira haree krime públiku ruma akontese no lei protesaun testemuña mós asegura no fó protesaun ba testemuña sira. Ida ne'e katak polisia no prokuradór sira tenke asegura no rai segredu ba testemuña sira nia identidade sira ka labele divulga ka fó hatene testemuña sira nia identidade ba parte sira ka públiku atu sira hatene.

Relasiona ho kestaun polisia mai halo investigasaun mak parte sira (vítima no suspeito) koko atu subar krime ne'e, nia konsekuénsia vítima mak sei continua sai vítima tanba nia tolera nia la'en baku, tanba ne'e atu hakotu korente violénsia iha família, vítima sira tenke kontribui ba jusitsa nune'e parte judisíariu/tribunál bele eduka arguidu atu hakotu korente violénsia iha familia.

Entretantu, kestaun kona-ba deskonfia rekrutamentu ilegál, JSMP esplika katak karik iha indísio ruma hatudu katak rekrutamentu ne'e ilegál no konsidera atu explora ema bele ba aprezneta keixa iha Polisia ka Ministériu Públiku. Ida ne'e, tanba tuir lei tentativa mós konsidera krime tanba ema ne'ebé halo rekrutamentu ilegál ne'e iha intensaun atu prátika tráfiku umanu no nia asaun ne'e la hotu ka la to'o iha nia objetivu tanba ema ruma hatene no ba apresenta keixa no karik prova ema ne'e iha intensaun atu prátika krime tráfiku umanu nia tenke responsabiliza nia hahalok ne'e tuir lei.

Kestaun kona-ba kazu envolve labarik sira sai autór no vítima ba krime, JSMP esplika katak ba kazu ne'ebé envolve labarik sai autór, tuir lei penál, labarik sira labele hetan kondensasaun ba sira nia hahalok krime ne'ebé sira halo tanba tuir lei sira seidak iha kapasidade atu intende saida mak sira halo no la haten rezultadu saida mak sei mosu husi sira nia hahalok ne'e. Nune'e, bainhira labarik sira komete krime ruma, desizaun tribunál nia sei lori labarik sira ne'e bai ha fatin rehabilitasaun atu rehabilita sira nia mentalidade atu aban-bainrua labele halo tan. Ba kestaun sira labarik mak sai vítima ba kazu ruma, iha lei penál sei hatodan nia kastigu tanba labarik sira konsidera ema sira ne'ebé vulnerável (laiha kbiit) no tuir lolos sira tenke hetan protesaun husi ema seluk maibé karik ema seluk halo fali violasaun hasoru sira, kastigu sei hatodan tan.

Kestaun kona-ba Polisia sira ne'ebé haree kazu violénsia doméstika maibé la halo partisipasaun, Polisia ne'e sei ba hatan krime ida naran la partisipasaun tanba konsidera Polisia ne'e subar krime ne'e no krime seluk ne'ebé Polisia ne'e komete mak krime abuza poder tanba tuir lei partisipasaun ne'e nuudar obrigasaun Polisia nian maibé nia viola nia obrigasaun ne'e.

Iha komentáriu partisipante sira nian ba metodolojia apresentasaun nian hanesan loka video no diskusaun grupu ne'e di'ak tebes no fasilita sira bele komprende matéria ho lalais no sira fiar katak ho metodolojia sira hanesan ne'e, comunidade sira ne'ebé lahatene lee no hakerek bele komprende matéria sira bainhira sira habelar informasaun sira ne'e ba membru comunidade sira seluk.

Partisipante sira iha treinamentu ne'e hamutuk ema na'in 22 ne'ebé kompostu husi feto 11 no mane 11. Partisipante sira ne'e kompostu husi xefe suku Beiseuc, xefe aldeia sira, Delegadu/a no juventude sira.

Treinamentu ne'e realiza ho apoiu finanseiru husi Governu Timor-Leste, liuhusi orsamentu Ministériu Interiór ne'ebé jere husi Ajénsia Nasoins Unidas UN Women.

Atu hetan informasaun liután favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <http://jsmp.tl> www.jsmp.tl